



Oqalugiaat

1 maj 2016

Nunarsuarmi sulisartut ulloq manna isummaminnik ataatsimoorlutik nittarsaasarfNissamittut toqqagaanni tamassi ullorsiorluarnissassinnik kissaateqarfigalusi tikilluaqquassi.

Ullumikkut sulisartuuneq nunarsuatsinni imaannaangitumik ingerlavoq, inuttut naleqassuseq ilaatigut ersippallaarunnaarsimasarpoq aamma suusupagineqartarpoq, taamaattumik ulloq manna unikaallalluta immitsinnut qiviarluta aperisariaqarpugut ilumut maanna sulinera uannut peqqinnartumik ingerlava ?.

Inuiaat kalaallit sulisartoqarnerup iluani ilaatigut nutarpassittumik atugaqarluta ingerlaarfitsinni ikioqatigiinnisarput pingaaruteqarpoq, piffissaq atussanngilarput kina kikkut qanoq ingerlanerannut malersussallugit, piffissarpulli atorluartariaqarparput qanoq nunami maani pinngorfitsinni nunaqavissugut suliassaqarfinnut qulliunerusunut atorfeqalernissatsinnut nukittorsassalluta aamma piginnaangorsassalluta, maannami naammalerpoq allanertat maangarlutik piginnaasaminnik qaffassaasarnerat, uagulli tamakku atorlualaartigit immitsinnut piumaffigaluta.

Aamma suliffeqarfinni uagut oqartussaaqataaffitsinni sulisunik aqutsisut allanertat pissutsinik ilisimasaqarnerunissaannik piumasaqarnerulertariaqarpugut, inuttummi immitsinnut kalaallinit taasartugut kultoorerput allanertat suusupagalugu nungusassanngippassuk oqartussaaqataanerput atorlugu killiliisariaqalerpugut.

Suliffeqarfinni uagut kommuunerput eqqarsaatigalugu ulloq unnuarlu suliffiusuni sulisunik ingerlatsinerup ilaatigut toriitsumik ingerlanneqarnera naammalerpoq, taamaattumik ataatsimoorluni suleqatigiilluni pissutsinik aqqiinissaq anguniarlugu suleqatigiinnissaq pisariaqarluinnaleqqavoq, sulisussameernerummi suliffeqarfiit annaanissaanut pissutissaangilaq, sulisartummi maanna sulerulutsitaanerata kinguneraa sulisut pikkorissut suliffinniit soraartarnerat, aammalu sulisartut oqartussaaqataanerup aqqani oqaloqataaniartut sulisitsisuniit pissutissaqarani soraarsitaasarnerat tassa naammaleqaaq unitsilli.

Ullumikkut ilisimavarput sulisartut illersugaanissaat eqqarsaatigalugu assigiinngitsunik kattuffippit isumaqatigiissuteqartarluni angusaqartarpoq, taamaattorli sulisitsisut isumaqatigiissutinik atuarnissaminnut piumassuseqarnerusariaqarput, suliffiit sulisartunit suliarforfigissallugit ullut tamaasa kajungernanerulissappata aqqutissaavoq pittassuaq.

Uagut kommuunerput eqqarsaatigalugu ukioq kingulleq aningaasaqarnikkut angusaqarpoq ilimagisamiit pittaanerumik, tamannalu uagut sulisartuusugut aamma sulilluarnitsigut pisimassasoq

ilamanarluinnarpoq, taamaattumik sulisartuusugut aamma immitsinnut pattalaarnissarput pisariaqarluinnarpoq, tassa suleqatigiilluni angusaqarnerup kingunera.

Nuna manna ineriartortinneqarnera eqqarsaatigalugu kikkut tamarmik suleqatigiinnissaannik pisariaqartitsinerat eqqarsaatigalugu isumaqarpunga suli annerusumik suleqatigiikkusussutsip piginissaa pingaartuusooq, ilami qinikkavulluunniit suleqatigiinnissamik oqalunnguurlutillu namminnerlu suleqateqarusussutsimik annerumik takutisisinnaanatilluunniit ingerlaarfianni uagut sulisartuusugut ilinniarfigisariaqaraluarpaatigut kikkunnut tamanut suleqateqarsinnaanitsinnik anneruniaannarneq ilisarnaasiunnagu.

Aamma taanngitsoorumangilara piffissami kingullermi paasigatsigu kiisami kujataa eqqarsaatigalugu silaannakkut kiffartuunneqarnerup pittaanerulaalernissaanik anguniagaqarnerup qanilliallannera, matumani ilaasunik silaannakkut angallassinerep maanngaanniit aallaaveqalernissaa eqqarsaatigalugu isumaqarluinnarama ilaatigu ullut arlalit Narsarsuarmi sapernusarnerup maanna akilersinnaanerumik sapernusalernissatsinnut iluaqutaalissammat nunatsinnut tamarmut, tassami sulisartuusugut ilaanni annaasaqartarpugut sapernugaangatta isertitassatsinnut, kiisalu aterfilittut angalassagaanni sapernunermi suliinnarsinnaaneq anguneqarsinnaangulerpoq qujanartumik, taamaalilluni aamma sulisartup piginnaasai unittoortitsinatik ingerlaannalissapput suliffimmi.

Sulisartuugatta sulerusussuseqarlutalu qinikkavut maanna piumaffigaagut suliffissanik pilersitsiniarnerminni qanimut malinnaateqqulluta, sulisartuugattami aamma ulluinnarni pissutsinik nutaanik pilersitsiniartunik qanimut malinnaarusuppugut suliassarpummi aallartinginnerani aamma piareersaqataarusuppugut sulinissatsinnut.

Naggataagut qinikkavut piumaffigaagut suliffissanik nutaanik ujartuinnaqqullugit, taamaattorli sulisartup inuttut peqqissusaanut minnerpaamilluunniit ajoqutaanngitsumik pilersitsinissarsi kissaatigaarput sullilluarisigullu suliffissaqaannaqqulluta, nunarput manna sullikkusupparput immitsinnullu pilersorluta inooqataarusuppugut sulisartuusugut.

Aammalu sulisartoqativut tamassi ullumi ullorsiorluarisi ullorlu naalluarisiuk.

Qujanaq.

Jacob G-Motzfeldt
Q.S.I.P "Sinniisoq"
Siulittaasoq